

五、貧人須摩持縷施佛緣

佛在舍衛國祇樹給孤獨園。時彼城中有一織師。名曰須摩。貧窮困苦。家無升斗。常行客織。用自存活。又於一日。作是念言。我以先身不布施故。今值貧窮。困苦如是。我於今者。復不布施。於將來世。遂貧轉劇。作是念已。我今當更勩加役力。推求少物。持用布施。於未來世。儻得是報。即便求索。得少許縷。涉道歸家。至一巷中。遙見世尊。著衣持鉢。將諸比丘。入城乞食。前詣佛所。尋持此縷。奉施世尊。世尊受已。即現衣破。尋用縫衣。時須漫那見佛。世尊縫補破衣。心懷歡喜。前禮佛足。發大誓願。即於佛前而說偈言。

所施雖微少 值大良福田

奉施世尊已 誓願後成佛

過度羣萌類 其數不可量

大威德世尊 當證知此事

爾時世尊說偈答曰

汝今值我故 歸誠發信施

未來當成佛 號名曰十_十綻

名聞遍十方 度脫不可量

爾時須摩聞佛世尊說此偈已。深生信敬。五體投地。發大誓願。持此施綻所有功德。於未來世。盲冥眾生。為作眼目。無歸依者。為作歸依。無救護者。為作救護。無解脫者。為作解脫。無安隱者。為作安隱。未涅槃者。令使涅槃。發是願已。佛便微笑。從其面門。出五色光。繞佛三匝。還從頂入。爾時阿難前白佛言。如來尊重。不妄有笑。有何因緣。今者微笑。唯願世尊。敷演解說。佛告阿難。汝今見是貧人。須摩以綻施我。心懷歡喜。發大誓願。不阿難白言。唯然已見。彼須摩者。以殷重心。施我綻。故於未來世。當得作佛。號曰十綻。廣度眾生。不可限量。是故笑耳。爾時諸比丘聞佛所說。歡喜奉行。